

Ungdommens kirkemøte 2019 sak 05/19

Misjon - å vere kyrkje

Vedtak

UKM 2019 vil gratulere Samarbeid menighet og misjon med 25-årsjubileum, og vonar dette vedtaket vert teke med i det vidare arbeidet.

Kyrkja er misjonal

Kyrkjemøtet har vedteke at Den norske kyrkja er misjonerande i sak KM 05/05 *En misjonerende kirke*. Misjon er ikkje noko kyrkja gjer, men noko kyrkja er. UKM 2019 meiner dette må bli kommunisert betre. Kyrkja og alle kristne er misjonale av natur: sendt for å dele evangeliet i ord og handling, globalt og lokalt. Denne tankegangen kan bryte med mange sitt bilete på misjon, der ein tidligare delte opp i ytre misjon (i utlandet) og indremisjon (heime i Noreg). Den norske kyrkja er viktig for nordmenn si tru, og ei misjonerande kyrkje er viktig i arbeidet mot nedgang i medlemstal. UKM 2019 meiner Den norske kyrkja oftare må gå ut – og ikkje berre invitere inn.

Som kristne er vi «skapt, døypt og sendt». Dette er omgrep Samarbeid menighet og misjon arbeider ut i frå. UKM 2019 meiner dette er gode ord for å forklare vår misjonale identitet, som burde bli betre innarbeidd i kyrkja. Omgrepet syner samanhengen mellom skaping, dåp og misjon: Vi er skapt av Gud, døypt til Jesus Kristus og sendt med Den heilage ande for å dele tru i ord og handling.

Å dele i kvardagen

Misjon handlar om å dele evangeliet i ord og handling. NMSU har formulert det som å «dele tru, tid, ting og talent». Når vi deler tru og tid bygger vi fellesskap og kan utforske tru i møte med andre. Når vi deler ting og talent kjempar vi mot urett og kan utgjere ein skilnad for andre¹. Det kan skje i kvardagen, det vere seg på skulen, i nabolaget, i lokallaget eller i kyrkja. Som skapt og døypt er vi sendt til å vere lys og salt i verda (Matt 5.13ff). Dette er ein ibuande eigenskap, der vi som kristne kan bety noko for andre med vårt liv og vår tru. Likevel opplever mange unge at det er utfordrande å dele tru i kvardagen.

UKM har tidlegare behandla sak om å dele tru mellom ungdom i sak UKM 07/15 - *Å dele tro blant ungdom*. I denne saka vart det lagt vekt på å skape trygge rammer der ein kan utforske truspraksis og utvikle eit språk for å snakke om tru og tvil. Dialog kan bidra til respekt, forståing og fred. Å snakke om tru med andre kristne kan styrke eiga tru, gjere at ein ser eiga tru i nytt lys og motivere til å snakke med ikkje-truande om si tru. Samiske ungdommar kan med sine erfaringar og sitt trusliv ha ei særskilt moglegheit til å bygge fellesskap og dele tru med andre urfolkungdom. Møte med minoritetar og urfolk sine trusperspektiv kan vere trusstyrkande for alle partar.

¹ <https://nmsu.no/wp-content/uploads/2018/08/Strategiplan-2016-2020.pdf>



Globalt engasjement skapar lokalt engasjement

Nær 80% av kyrkjelydane har avtale med ein misjonsorganisasjon om eit misjonsprosjekt. Ungdom må ta del og få del i dette arbeidet. Kyrkjemøtet seier at ungdom er særleg viktig i arbeidet med kyrkjelyden sitt misjonsprosjekt i sak KM 12/00 - *Samarbeidsråd for menighet og misjon - evaluering og videreføring*. Ein kan bli kjent med prosjektet ved å kommunisere gjennom internett, sosiale medier, dra på besøk eller få besøk. Unge kan utfordrast til å arrangere ein innsamlingsaksjon som eit tillegg til økonomiske bidrag via kollekt i gudstenesta, eventuelt medverke i eksisterande innsamlingsaksjon. Det kan òg skje på tvers av kyrkjelydar. Misjonsorganisasjonane har ressursar og ordningar for dette. Engasjement rundt eit felles prosjekt kan skape eigarskap, meistring for den enkelte og gje tilhøyrsløse i kyrkja.

Kyrkjelyden sitt misjonsprosjekt må i større grad kome til syne i trusopplæringa. Å bli kjend med eit prosjekt og misjon som born, og følgje dette over tid, gjev eigarskap og ein identitet i den verdsvide kyrkja. Dette er òg eit innsteg for å formidle identiteten som skapt, døypt og sendt, slik at born og unge vert oppmoda til å dele med dei rundt seg i kvardagen.

Samiske perspektiv på misjon

Misjon har bidrege til framvekst av sjølvstendige kyrkjer i det globale sør, men har òg vore tett knytt til fornorskingspolitikk og kolonialisme. UKM 2019 forstår at misjon enno gjev negative assosiasjonar i delar av befolkninga. Sjølv om leiarar frå samisk kyrkjeliv, kyrkja og misjonsorganisasjonar arbeider ut i frå ei ny forståing av misjon², er ikkje dette nødvendigvis forankra i heile det samiske folk – og det kan vere skilander mellom unge og eldre. Det vil difor vere nyttig å få meir kunnskap om samiske ungdom sitt syn på misjon og synet på orsakingane som har blitt gjeve frå kyrkja – og kva som eventuelt burde gjerast vidare.

Utfordringar

UKM 2019 utfordrar alle tilsette i kyrkja, alle folkevalde og særleg Kyrkjemøtet, til å ta den misjonale identiteten på alvor, og la dette kome til syne i prioriteringar, arrangement, kommunikasjon og forkynning.

UKM 2019 utfordrar tilsette og frivillige i kyrkja og barne- og ungdomsorganisasjonane til å skape trygge rom for å snakke om tru og tvil, samt å oppmuntre, støtte og rettleie unge til å vere lys og salt i kvardagen, så ungdommane òg kan vere til støtte for kvarandre.

UKM 2019 utfordrar alle kyrkjelydar til å ha misjonsavtale med ein misjonsorganisasjon, trekke dette fram i barne- og ungdomsarbeidet, og gje ungdom ansvar og oppgåver i dette arbeidet. Misjonsorganisasjonane må sørge for gode ressursar til dette.

UKM 2019 utfordrar Samisk kyrkjeråd til å innhente meir informasjon gjennom ei spørjeundersøking om samiske ungdom sine synspunkt på misjon og utfordrar SUNG og UFUNG til å arbeide med svara på denne.

² <https://kirken.no/nb-NO/SMM/nyhetsartikler/misjon-og-urfolk/>